

全唐文

201704

201704

201704

20170 2 201704

201704



欽定全唐文卷二百九十目錄

張九齡八

請郊見上帝議

駁宋慶禮諡議

應道侔伊呂科對策第一道


並問

第二道

第三道

上姚令公書

答嚴給事書



與李讓侍御書

集賢殿書院奉敕送學士張說上賜燕序

陪王司馬宴王少府東閣序

益州長史叔置酒宴別序

景龍觀山亭集送密縣高贊府序

歲除陪王司馬登薛公逍遙臺序

餞宋司馬序

送幽州王長史赴軍序

韋司馬別業集序

別韋侍御使蜀序

獅子贊序

鷹鵠圖贊序

歐陽文忠公集

卷之九

歐陽文忠公集

欽定全唐文卷二百九十

張九齡

八

請郊見上帝議

伏以天者百神之君王者所由受命也自古繼統之主必有郊配之義蓋以敬天命報所受也故於郊義則不以德澤未洽年穀未登凡事之故而闕其禮昔者周公郊祀后稷以配天謂成王幼沖周公居攝猶用其禮明不可廢也漢丞相匡衡曰帝王之事莫重乎郊祀董仲舒又云不郊而祭山川失祭之事且逆於禮故春秋非之臣謂衡仲舒

古之知禮皆以郊之祭所宜先也陛下紹休聖緒於今五載既光太平之業未行大報之禮考之於經義或未通今百穀嘉生鳥獸咸若夷狄內附兵革用弭乃怠於事天恐不可以訓願以迎日之至升紫壇陳采席定天位則聖典遵矣

駁宋慶禮諡議

慶禮在人苦節爲國勞臣一行邊陲三十年所戶庭可樂彼獨安於傳遞稼穡惟艱又能實於軍廩莫不服勞辱之事而匪懈其心守貞堅之規而自盡其力有一於此人之



所難況營州者鎮彼戎夷扼喉斷臂逆則制其死命順則  
爲其主人是稱樂都其來尚矣往緣趙文翮作牧馭之非  
才自經墮廢便長寇孽故二十年閒有事東鄙僵屍暴骨  
敗將覆軍蓋不可勝紀大明臨下聖謀獨斷恢祖宗之舊  
復大禹之迹以數千之役徒無甲兵之強衛指期遂往稟  
命而行於是量畚築執磬鼓親總其役不愆所慮俾柳城  
爲金湯之險林胡生腹心之疾蓋爲此也尋而罷海運收  
歲儲邊亭晏然河朔無擾與夫興師之費轉輸之勞較其  
優劣孰爲利害而云所亾萬計一何謬哉及契丹背誕之

日懼我犄角之勢雖鼠穴自固而駒牧無侵蓋張星彼都  
繫賴之力也安有踐其跡以制其實貶其諡以徇其虛採  
慮始之謗聲忘經遠之權利義非得所孰謂其可請以所  
議更下太常庶表行之迹可尋易名之典不墜者也

應道侔伊呂科對策第一道

並問

問興化致治必俟得人求賢審官莫先慎舉聖朝受命於  
今百齡堯封比屋魏網斯頓史曹之職衡鏡攸歸歲時調  
集士踰累萬借使崔毛重起裴樂復存觀貌察言且猶未  
暇考行徵實其可得乎若遠循漢魏之規復存州郡之選

卽務辭會府權歸外臺牧守之明何法能鑒變通之要厥  
路奚由文武之道並用無偏軍旅之制事宜經遠而越騎  
飲飛皆出畿甸丁年負甲耆日釋戈凶歿蓋多軍容每闕  
今欲均井田於要服遵兵賦於革車恐習俗滋深慮始難  
就揆今酌古其衷若何且惠在安人政惟重穀頃承平旣  
久居泰易盈編戶流亾農桑莫贍精求良吏未之能補遂  
其寬施則莫懲遊食峻其科禁則慮擾疲人革弊適時應  
有良術子等並明於國體允應於旁求式陳開物之宜無  
效循常之對

對嗣魯王道堅所舉道侔伊呂科徵仕郎行祕書省校書  
郎張九齡伏覽睿問大哉國體九品流弊嘗所憮焉幸因  
對揚庶言其可古者諸侯貢士司徒論士必講禮觀能鄉  
舉里選故十五十八之歲大學小學之節誦習以時教化  
以禮則孝悌之行可知於鄉曲政事之業可升於國朝先  
王務教此其大者及周道旣衰斯文將喪秦氏滅學唯力  
是親仁義大壞俊造亦亾漢高以馬上非禮復修三代之  
事魏武以軍中是務權立九品之儀後代因循莫能改作  
紛紛橫調滔滔皆是天下公器可謂傷心伏惟陛下神啟

睿圖天佑明德物不終否故受之以泰弊不遂極乃鼎之  
以新滌瑕蕩穢今其時也伏願圖之夫正其本者萬事理  
勞於求者逸於使豈有大明御宇慮此假權之人循良擇  
人安得謝恩之議是則外臺會府眞若滿於貯中濟理適  
時復何殊於掌上者也且有備無患亾戰必危是以振旅  
芟舍之儀羽林飲飛之衛漢家徵選咸出五陵周制供王  
不踰千里此以均其遠近會其中正王者之制豈虛乎哉  
必開井賦於要服俾裒益於畿甸雖經始之規何施不可  
而圖遠之業猶願勿遵且將振九品之頽綱維百王之絕

略使官有位次資有等衰才苟不侔時所勿取使夫能者  
代上帝之理議者息高門之談吏精其心人享其利流庸  
不日而來復耕桑何憂乎不稔動之斯應綏之斯來若惟  
作法於末途非救弊之本意盛德大業孰與歸乎某怖慄  
塵埃棲棲非得言之地慷慨禾莠惓惓因獻策之時何敢  
望焉盡心而已謹對

第二道

對王道務德不來不強臣霸道尚功不伏不偃武此勞逸  
異數得失可名故曰務廣德者昌務廣地者亾是時漢武

事胡豈比重華之干羽秦皇成越奚擬公劉之橐囊雖古  
人有言引之者有同於河漢而王者大化行之者必本於  
唐虞不亦然乎此則開基之大者也國家因已有之地廣  
無私之仁犬戎卽敘肅慎入貢若力不能救豈惟桓公之  
恥征在其蘇是必成湯之怨然而春秋所貴惟義所在內  
諸夏而外夷狄此明中國恐弊不興異域之功下人苟安  
何惜救兵之舉則知弔伐之義隨時之道也今頗彫弊抑  
非其時至如守塞則侯應之言爲得斥地則蒙恬之弊可  
知前事昭昭足爲明戒者也必欲繫單于之頸裂匈奴之

肩奚霽背恩受制於北虜小人發憤請議于東征謹對

第三道

對伏惟殿下德成問安教存齒學則孝悌之感元良之貞  
詠子衿之詩義形乎辭真吾君之子也天下幸甚幸甚伏  
以化憑於勢聲若順風之遠感因於時德甚置郵之速則  
何草不偃何心不應而曰未能動俗殿下之至謙也尚何  
術之務而捨此乎今又降意微言徵諸墜典至如黃帝斷  
木蓋取諸意文王演卦乃言其象雖成象之時不同而得  
意之言一也周公制禮夏正得天縱損益可知而因循不



改去聖既遠禮經殊殘遺文苟存羣儒紛糅故喪服  
諸家殊軌故王肅之旨約情以斷鄭元之言引經取決呂  
氏因封侯之餘俗採禮官之舊儀故戴聖採十二紀之首  
爲十二月令存周之典其故匪他仲尼以尊魯而取美於  
頌穆公以尊周而見序於書左氏以艷富稱誣穀梁以文  
清爲婉范甯序事其義則詳樂書因秦而遂亾空有河閒  
之制夾氏在傳而不見惟餘班固之說謹對

上姚令公書

月日左拾遺張九齡謹奏記紫微令梁公閣下公登廟堂

運天下者久矣入之情僞事之得失所更多矣非曲學之說小子之慮所能損益亦已明矣然而意有不盡未可息區區之懷或以見容亦猶用九九之術以此道也忍棄之乎今君侯秉天下之鈞爲聖朝之佐大見信用渴日太平千載一時胡可遇也而君侯旣遇非常之主已踐難得之機加以明若鏡中運如掌上有形必察無往不臻朝暮義軒之時何云伊呂而已際會易失功業垂成而舉朝之眾傾心前人之弊未盡往往擬議愚用惜焉何者任人當才爲政大體與之共理無出此途而最之用才無知人之

鑒其所以失溺在緣情之舉夫見勢則附俗人之所能也  
與不妄受志士之所難也君侯察其苟附及不輕受就而  
厚之因而用之則禽息之首爲知己而必碎豫讓之身感  
國士而能漆至於合如市道廉公之門客虛盈勢比崔羅  
廷尉之交情貴賤初則許之以死殉體面俱柔終乃背之  
而飽飛身名已遂小人恒態不可不察自君侯職相國之  
重持用人之權而淺中弱植之徒已延頸企踵而至諂親  
戚以求譽媚賓客以取容情結笑言談生羽翼萬事至廣  
千變難知其閒豈不有才所失在於無恥君侯或棄其所

短收其所長人且不知淡旨之若斯便謂盡私於此輩其  
有議者則曰不識宰相無以得遷不因交遊無以求進明  
主在上君侯爲相安得此言猶出其口某所以爲君侯至  
惜也且人可誠感難可戶說爲君侯之計謝媒介之徒卽  
雖有所長一皆沮抑專謀選眾之舉息彼訕上之失禍生  
有胎亦不可忽嗚呼古人有言禦寒莫若重裘止謗莫如  
自修修之至極何謗不息勿曰無害其禍將大夫長才廣  
度珠潛璧匿無先容以求達雖後時而自寧今豈無之何  
近何遠但問於其類人焉廋哉雖不識之有何不可是知

女不私人可以爲婦矣士不苟進可以爲臣矣此君侯之  
度內耳安用小人之說爲固知山藏海納言之無咎下情  
上通氣用和洽是以不敢默默而已也願無以人故而廢  
其言以傷君侯之明此至願也幸甚幸甚

答嚴給事書

自出江郡慰誨累及情義已積昆弟無喻人生相知可謂  
厚矣僕方請歸養從此告辭會面無期所懷當盡故復累  
而言之耳凡爲前相所厚者豈必惡人耶僕爰自書生燕  
公待以族子頗以文章見許不因勢利而合但推獎之日

不量不才引致掖垣有負時議然則初有超拔豈由本心  
嗷嗷之口曾不是察既不稱其服又加之讒聞負乘致寇  
幾於不免當此時也若無所容以孤特之身處背憎之地  
自怪旣往何幸而全追想寒心怵怵發悸巖子足下不意  
而然旣而遠出猶有餘釁巧言潛構期僕傾危故使者之  
來怒於心而色於事賴於自慎幸且無咎不者吹毛洗垢  
求其痕疵勢窮力屈將無控告未始怯事也有爲而然以  
故春中有書薄言求庇足下猶不諒此意以爲汲汲於聲  
名而乃約以莊生之言博以東山之法曉導精至誠故人

之情向之所防有異來旨彼二教者忘情滅識無有纏愛  
故福至不喜禍至不憂今僕養親豈復割離恩愛直措心  
於此地哉正欲惟疾之憂全身遠害故雖在小小敢不兢  
兢至如自放身心雖復懵昧幸受教於君子亦聞道於古  
人豈不能少有所適方復屑屑於毀譽之際也管仲嘗三  
戰三北而鮑子不以爲無勇以其有親足下寧不我知而  
有此誨且往者不自量力因緣小技蹶躓于進荏苒歷年  
固以爲運屬盛明朝多君子義能容物而忘其孤陋則不  
知弊帚之貴末路多艱今專典一州蓋幸遇已甚而平生

萬事爲寒暑所移雖忝簪纓若墜泉壑者耳誠恥令名之不副寵章也昔賈誼才偕管晏言則霸王名重漢廷官止梁傅班固猶云未爲不遇況僕擬非其倫遇已過彼顧多慙色豈敢怨而更求歟足下知心當明義有所在耳尊者慈愛諸下懷寧本鄉不欲隨官重有離別春秋高矣晨昏久違僕豈復規規然徼無妄之福在悔愆之動而迫無所恃單子獨立萬一蹉跌或遠庭闈朝心不開暮髮盡白行已五十獨不知命是以冒死抗疏乞歸侍藥一則潔膳以減下情二則辭滿而無貽憂周易曰飛鳥遺之音不宐上



宐下蓋取此義亦自卜者審也顧恨上負明主邱山之恩  
未有涓塵之答下愧知己契獎之力卒無如言之效又平  
生不飾小節苟取虛名使吠聲之徒退有後議竟未獲盡  
展所有之用以塞罔極之讒碌碌而歸不能不耿耿耳古  
人有從所好者僕亦有心庶承顏之人任性自適軒冕之  
事亦云儻來林澤之間聊足散慮縱絕後望亦了一生何  
必崎嶇不平齟齬求入然後爲得也去矣嚴子勉事聖君  
儻存平仲久要之言無惜詩人金玉之問幸甚張九齡白

與李讓侍御書

李公足下夫心以義持公爲時出雖冥冥入窮神之奧鬼  
莫我窺而恟恟自眾人之口通者誰惑何則我有獨見之  
明物無浮言之信亦猶太阿之劍犀角不足齒其鋒高山  
之松霜霰不能渝其操斯豈非愛惡則物之相背而終始  
則我之不移且如明公義貫心靈人推正直遂乃雄飛清  
憲高步等夷向若見不決於明濟不兼於物終然獨善而  
已何自致之若是乎如此則明公獨運之機以獲當仁之  
利固人情之可恕何橫議之能干昨所造次下風求爲從  
者亦望心與道合申一言而取容人以義圖輕千駟如脫

屣則不意制以形骸之外拘於牙齒之間蓋下慎閉門而  
公奚措意夫國家所以歷試官序推擇士林雖因時買利  
之夫猶能變節而服義亾軀之意奚遽生疑此亦人言亦  
何害歲寒之取效然明公所以不容左右誠非克堪固當  
別有嚶鳴如爲蛇足而以爲家屬在彼用防未然旣明公  
之慮極精微亦下官之心懷感激何者至如中朝著姓連  
姻華族及夫委以鈞軸綜其條流而朝廷豈可南求僭耳  
之酋北取旄頭之虜必佇異方之任乃無內顧之私者耶  
故知事有是非公無遠近昔如祁奚之舉子不避其親齊

人之爲盜固在於楚是以爲善在已執一心之既定詭道  
從時乃千人之所指然下官所以勤勤自致其功靡他正  
以居本海隅始無朝望昔遇光華啟旦朝制旁求誤登射  
策之科忝職藏書之閣又屬朝廷尚義端士相趨復以無  
依見容不時弃置所以遲迴城闕感激身名未甘田里之  
平人所慕君親之大義而才能不急時用無施俸猶擬於  
侏儒舉未優於儲待所以饑寒在慮扶持增遙而慈親在  
堂如日將暮遂乃甘心附麗乘便歸寧不然則命非飲冰  
幸安中土又安能崎嶇執事之末還無一級去且二年願

明公審圖彼人向者何爲嗚呼忠信獲戾古人之言惟教  
義之所矜乃譏嫌之見及恨不能隨肝嘗膽徇知己以求  
申而飲氣吞聲負當年而歎息庭闈眷戀行路屏營斯薄  
宦之所嬰念勞生之有役望美高傳何嗟及矣炯炯式微  
心爲誰矣轉當側聽妙選用息鄙心心之有懷言不能盡  
某再拜

集賢殿書院奉敕送學士張說上賜燕序

集賢殿者本集仙殿也上不以惟睿作聖而猶垂意好學  
用相必本於經術圖王亦始於師臣及乎鴻生碩儒博聞

多識之士自開元肇建以迄於今大用徵集煥乎廣內而聽政餘暇式燕在茲忠臣嘉賓得盡心之所聰明文思有光被之德故下以道親上亦歡甚卽於御座爰發德音以爲候彼神人事雖千載傳於方士言固不經遂改仙爲賢去華務實且有後命增其學秩是以集賢之庭更爲論思之室矣中書令燕國公外弼庶績以奉沃心之謀內講六經以成潤色之業故得出入華殿師長翰林惟帝用臧固天所賴拜命之日荷寵有加降聖酒之壘頒御廚之膳食以樂侑人斯德飽時有侍中安陽公等承恩預焉學士右

散騎常侍東海公等攝職在焉或禹稷大賢或泉雲諸彥  
文王多士周室以寧武帝得人漢家爲盛而高視前古獨  
不在於今乎咸可賦詩以光鴻烈

陪王司馬宴王少府東閣序

夫道行與廢命也非謀之不臧命通與塞時也豈力之爲  
弊古之君子推其分養其和仲尼得之以絃歌傳說因之  
以版築至若詩有怨刺之作騷有愁思之文求之微言匪  
云大雅王六官志其大者司馬公引而申之謫居何心不  
欲賈生之投弔窮愁非我安用虞卿之著書嘗以風月在

懷江山爲事簿領何廢形勝不辜旣好樂而無荒亦上同  
而不混迨乎倚層閣憑華軒川澤清明上懸秋景岑嶺迴  
合下帶溪流聯草樹而心搖際烟氛而目盡茲邦枕倚是  
日登臨豈子虛之過詫誠仲宣之信美物色起殊鄉之感  
誰則無情而道術得異人之資吾方有遣於是旨酒時獻  
清談閒發歌滄浪以放言詠蟋蟀而傷儉蓋古人之作者  
豈異於斯盍賦詩以揚其美

益州長史叔置酒宴別序

天子建五長守四方內以承衛京師外以攘却戎狄則有



持其節制未十年而歷踐撫其封疆旣一行而寧輯盡在  
我叔父備聞於朝廷昔者吉甫是欽仲著孝友之德楚子  
所畏趨在諸侯之選世有實績今以美濟俾我張氏鬱彼  
士林以媚於一人以正於四國豈非德能光大謀必變通  
思古人之獲心施君子之不器所以前拜小司馬兼擁旄  
於五命今爲左常侍仍總戎於三蜀軌模素遠綽有先路  
之風聲車服載馳光被上軍之禮命莫不文茵暢轂淑旂  
綏章嘽嘽皇皇途將出於華陽威已疊乎夜郎是時也四  
序鱗次屬當春夏之交千里草長有懷原隰之往乃闢軒

宇邀賓寮自髦士而及同姓由金華而下建禮或交以道  
合豈徒肆好之風或情以族親所謂宗盟之義龜組交映  
肴藪駢羅而聲欲成文發中堂之絃管志在擊節感四座  
之衣冠必名義而爲言雖聚散而何有酒酣相顧驪歌乃  
作白日西下求壯士之翻車青山南登愛忠臣之叱馭凡  
我明懿賦詩餞行

景龍觀山亭集送密縣高贊府序

景龍東山初主第也始其置金榜築鳳臺窮土木之功極  
岡巒之勢議與磐石同體造化較力何其壯哉自吾君茅

茨不翦采椽不斲旣抑華而務實將設教以垂範以故平  
陽化焉罷歌舞於其地麻姑見者變桑田於此時所謂長  
女之宮鬱爲列仙之館其後嘗有好事以爲勝遊今日芳  
辰攜手接袂往往而在祇取樂焉高十官雌伏都畿星言  
至止聞殊庭之可尚召嘉客以相歡徒觀其匠幽奇宅爽  
塏十里九版豈惟梁氏之作千巖萬壑宛是吳中之事青  
林修聳而垂綵綠蘿蒙籠以結陰清流若鏡下照金沙之  
底雜花如錦傍緣石菌之崖則可以藻飾形神揮斥氛滓  
相顧風塵之表無負雲霄之槩旣而東主西賓酒酣樂闋

聚必有散匪伊麋鹿之羣往而不返固亦山林之弊高公  
 乃振衣而起舉盃有屬却計送人出長安之東道退思征  
 馬向洛陽之南阡雖暫勞於州縣迫於簿領方欲厭於承  
 明資其騫躍夫如是相知意氣何恨此離盍賦詩焉以贈  
 行者聞和武之下尚各語客以醉博其贈其面也

歲除陪王司馬登薛公道遙臺序

故郡城有荒臺焉雖層宇落構而遺制歸然邑老相傳斯  
 則薛公道衡之所憩也薛公不容隋季出守海隅豈作臺  
 榭以崇奢蓋因邱陵而視遠必有以清滌孤憤舒嘯佳辰

寄文翰以相宣仰風流而未泯今司馬公英達好古清譽  
滿時迹有忤於貴臣道未行於明主以長沙下國同賈誼  
之謫居六安遠郡無桓譚之不樂嘗以爲仁不異遠必敷  
政以愛人窮當益堅已坦懷而樂地屬府庭閒暇江浦清  
明南土陽和覺寒氛之向盡東郊候暖愛春色之先來於  
是命輕舸以乘流趣高臺而降望越荒堞披古道躋隱嶙  
而三休俯芊綿而四極其遠則烟連墟井指甌貉以南馳  
雲合山川距荆吳而北走其近則溪谿見底鱗介之所出  
沒喬林夾岸羽毛之所翱翔悠哉薛公無不寄也意神奇

之可接陟彼峻隅想風景之不殊翦爲茂草司馬公又以  
爲峴山故事感羊祜以興言湘水遺風懷屈原而可作況  
登高能賦得無述焉某實小人受教君子雖羲之樂會稽  
之士自與許詢而仲舉禮豫章之人復招徐孺是日也羣  
英在焉猥惟陋才忝陪下列祇命爲序請各言詩

餞宋司馬序

宋司馬才通命塞雲翼泥蟠蔡邕朔方不廢琴書之業賈  
誼宣室欲言鬼神之事旣而出宿南浦與鴻鴈而同歸追  
餞北梁對江山而不樂是日渚雲欲霽林鳥將春惜時物

之方華重情人之自遠  
公有感中座無歡他口清風自  
當元度之夕茲辰零雨得無子荆之詠遂相與援翰賦詩  
贈行

送幽州王長史赴軍序

漁陽我之巨鎮也慎選軍佐敷求國良以王公能有命汝  
往底其耕戰之事介於將吏之間則已聲籍天庭氣雄遼  
碣鷹揚有日馬首欲東自名卿大夫與時髦懿士莫不激  
其節而重其邁結軫連袂攜壺抱琴留飲極於郊歧望美  
延於朔裔者不可勝數仲月暄矣陽時賁若植物之發芳

香行人之感意氣不曰羣萃豈懷安於鹿豕不曰垂堂已  
載馳於原隰孰不知西笑之美況伊歲華東征之勤兼彼  
戎旅蓋樂不遑舍君人之所難義不顧私志士之爲用今  
之作者聞而休之各賦詩一章以志其善也

韋司馬別業集序

杜城南曲斯近郊之美者也背原面川前峙太一清渠修  
竹左並宐春山靄下連谿氣中絕此皆韋公之有也余固  
已聞之開元歲夏四月猥忝散職居多放情跂彼一行無  
忘於夙尚時其七召果獲於前期迺與起居舍人蔡公萬



年主簿韓公惠而得朋欣然命駕韋公方拭席見待羞以  
藥物之滋倚琴相歡雜以嘯歌之韻清言移景閒步周林  
翻飛自情俯仰爲得斯亦吾儕之樂事幸可而同也扶陽  
餘慶磻溪古迹樹留梓漆器用天成庭漸芝蘭馨香世襲  
斯乃韋氏之懿業是所爲異焉而韋公尚其同之樂忘其  
異之貴均林棲於服冕齊鼎食於榮枯彼未可量吾見其  
大迹繼前軌將爲龍以爲光道包遠圖豈一邱而一壑二  
三君子相與志之云

別韋侍御使蜀序

予之友曰韋侯始以才進中而遇坎自廷尉評爲益州刺史行欲美也玉映而山輝善無小也鶴鳴而天聽俄自謫宦假其察視奮飛泥蟠皇華原隰爲持斧之吏受負弩之禮非其明義清節高邁卓絕時輩所美朝議推多亦焉得利其往蹇而振其廢滯而今而後予有以見舉德之輜爲神之介雖不本於利而終享其實者有矣夫火中暑徂使車云邁心同道合旨酒有踐或席次林園或觴臨郊歧風流相從日夕以繼者於若人如此其厚也僉以爲無欲而自致韋子之謂道有善而不揚友朋之爲過然則今之所

至莫近於詩盡賦一章以美吾友故有斯作也

獅子贊序

夫德之所感者深物之所懷者遠中國有聖占候而自來  
四夷不王征伐而難致故絕域有來貢沒羽諸侯有不入  
苞茅舉其大凡不在遐邇頃有至自南海厥繇西域獻其  
方物而獅子在焉爾雅所謂狻麈如虬貓食虎豹今之所  
見信然絕猛者也其天骨雄詭材力傑異得金精之剛爲  
毛羣之特伉立不動而九牛相去眈視且瞋則百獸皆伏  
所以肉視犀象孩撫熊羆其餘瑣細不置牙齒我天子示

柔遠之義國無不庭有伏猛之威物無難制故其受羈絆  
伏閑阜馴而爲用鋒莫可當然吾君所存義不謂此蓋蠻  
夷君長歲時貢獻或殊瑛絕賫實於內府或異獸奇禽擾  
於外囿皆其覲禮若中國之贄幣所不辭讓明異方之臣  
妾此則非有利物之心充耳目之翫好以爲懷柔之道示  
天地之含容不其然歟固無德而稱也義異獒犬豈勞召  
公之訓美同赤豹何關韓侯之詩凡我侍臣爲之贊云

鷹鶻圖贊序

鳥之鷙者曰鷹曰鶻鷹也者名揚於尚父義見於詩鶻也

者迹隱於古人史闕其載豈昔之多識物亦有遺將今而  
嘉生材無不出爲所呼之變與所記之不同者耶然於羽  
族之中絕有豪傑之表氣感剛悍體侷銛鋒顧視之間偉  
如也夫授以勁翮意不羣飛資其利背義在鮮食生有白  
然之權用無可抑之勢古之言武士法吏齊名比義者以  
其嚴若郅都飛若李廣委質於所事報功於所養不憚摧  
翼以虧勇不立垂枝以屈節是鳥也向之擬議不亦宜乎  
夫鸞與鳳將感於仁所不及也鷄與鶴猶較其德彼何有  
焉況其餘雖飛雖鳴凡者怪者肉非登俎才非下韉威力

不敵羣噪無益然後知二禽之爲用眾鳥之絕倫者也故  
君子韙其然工人圖其狀以象武備以彰才美雖未極其  
天姿有以見其風骨矣昔支遁道林常養名馬自云重其  
神駿斯圖也非彼人之徒歟

欽定全唐文卷二百九十一目錄

張九齡 九

開大庾嶺路記

聖應圖贊 并序

侍中兼吏部尚書裴公畫像贊 并序

宋使君寫真圖贊 并序

畫天尊像銘 并序

隴西縣君牛氏像龕碑

故襄州刺史靳公遺愛碑銘 并序

大唐故光祿大夫右散騎常侍集賢院學士贈太

子少保東海徐文公神道碑銘

并序

大唐金紫光祿大夫行侍中兼吏部尚書宏文館

學士贈太師正平忠獻公裴公碑銘

并序

中兼吏部尚書裴公畫射贊

并序

望瀛圖贊

并序

開大吏薛勳贊

類大鑑

并序

金定全唐文卷二百九十一目錄



欽定全唐文卷二百九十一

張九齡

開大庾嶺路記

先天二載龍集癸丑我皇帝御宇之明年也理內及外窮  
幽極遠日月普燭舟車運行無不求其所寧易其所弊者  
也初嶺東廢路人苦峻極行逕夤緣數里重林之表飛梁  
巖巖千丈層崖之半顛躋用惕漸絕其元故以載則曾不  
容軌以運則負之以背而海外諸國日以通商齒革羽毛  
之殷魚鹽蜃蛤之利上足以備府庫之用下足以贍江淮

之求而越人綿力薄材夫負妻戴勞亦久矣不虞一朝而見恤者也不有聖政其何以臻茲乎開元四載冬十有一月俾使臣左拾遺內供奉張九齡飲冰矢懷執藝是度緣磴道披灌叢相其山谷之宜革其坂險之故歲已農隙人斯子來役匪逾時成者不日則已坦坦而方五軌闐闐而走四通轉輸以之化勞高深爲之失險於是乎鑿耳貫胸之類殊瑛絕賁之人有宿有息如京如坻寧與夫越裳白雉之時尉佗翠鳥之獻語重九譯數上千雙若斯而已哉凡趣徒役者聚而議曰慮始者功百而變常樂成者利十

而易業一隅何幸二者盡就況啓而未通通而未有斯事  
之盛皆我國家元澤寔遠絕垠胥洎古所不載寧可默而  
無述也盍刊石立紀以貽來裔是以追之琢之樹之不朽

聖應圖贊

并序

臣聞啓聖者天也宥有以覺悟受命者聖也必有以明徵  
故神不言而可知時將至而先兆當陛下龍潛上黨也或  
託類於雲物或效靈於卜筮意者天之丁寧垂象唯恐後  
時又以潞水之泓澗山鹿之捷走馳明是獲厲流不濡非  
力所能以明或躍乾之上體時在九四神道幽贊聖期密

邇自後而占何著明其若此蓋天福海內地降聖跡以瑞

非常之后以決如神之策至於再三明必信耳有郡掾崔

弼時其從行見龍騎先馳謂河流可涉亦既數步遽已滅

頂不沈也安足以驗飛無凡也於何以昭聖事來自久命

常維新臣不勝至願謹為聖應圖遂獻贊曰

龍之或躍泉有何深神亦成象化為背禽凌厲是獲明命

則忱如彼從掾焉能不沈

侍中兼吏部尚書裴公畫像贊

并序

元聖有作大賢將其命良弼有二侍中是其一所從龍尻

實感風雲我之裴公道與上合義深體國策在忠主亦既  
致於堯舜不惟比於管樂至於執人柄振天綱丹青帝圖  
金玉王度雖古之作合謂之有開未始聞也夫事可法道  
可度威可畏儀可象赫喧中來精英外發故工繪其事所  
以見盛德之形容士頌其功所以知和氣之導達五事曰  
貌一以作恭七聲成文六乃爲頌俾凡今之人色斯而覩  
與聽之而知理水有方折辨和氏之價焉山爲具瞻表師  
尹之重焉贊曰

赫喧人望時爲國紀偉量川渟高標嶽峙磊落成節精明

入理倬哉輔臣式是多士丹青炳發儼如至止

宋使君寫真圖贊

并序

夫形者神明之表而動用之應也察之苟至則珠玉雖蘊  
光輝必兆於山泉而矚睫可知賢達亦徵於骨象如宋公  
之天姿森挺人望儼然一覩清揚不俟深鑒是猶雞羣見  
鶴象齒非牛居然有差此其殊特者也聲聞如彼風格又  
爾寧有陳平之美更虞子羽失之耶雖妄庸之目素非知  
公者偶見斯狀亦已明其瑰異焉初公舉茂才歷長安尉  
三爲御史再入尚書郎色莊以立朝則百僚所憚言揚於

伏奏則三臺爲表而竟以出守俄復從邊其故何哉由抗  
直之爲患也然公處屯而必行其道居陋而不改其度能  
貞其節可謂君子哉才爲國而生命有時而泰彼宋公修  
志以俟也其復可立而須焉時其族兄曰之望者亦賈生  
之謫居有顧君之畫絕偉公之貌作爲是圖意得神傳筆  
精形似因命僕爲贊其詞云

宋公卓犖體標山嶽匪石不移如玉斯琢被服忠信規模

禮樂望之儼然允謂高邈

畫天尊像銘

并序

畫天尊像者贈吏部侍郎武功蘇公夫人崔氏爲公卒哭之所作也蘇公有重名於時未大用而卒遭命不遂當代所悲況作嬪於公鞠凶在疚援詩以誓其節執禮而哭於晝哀而能感感而能通極希微而不見中恍惚其如在於是欲介景福將祈太清因心寓象命工設色飾金闕圖下皇元天不遠眞官在列飄若靈氣爛其神光彼昭厥誠介速其應斯所謂元鑒無昧當受謁帝之符幽魂有憑必畧昇仙之錄此固崔氏之至願也有足悲者不其猗歟銘曰至哉天京災劫不及上有靈府聖眞所集彼美孟姜聞斯



洞彰仙道貴度我君則凶猗歟我君蔚為人傑命屈金鉉  
神傳王訣遊魂大素介福上清式圖元象永觀厥成

隴西縣君牛氏像龕碑

粵若稽古有釋迦如來示滅雙林常在

三闕二能七權

多所康濟天水趙氏之七子者若人有

闕一極八先 姓

作禮導師心不可以即空事不可

闕七 慈作為應身生未

悟之

闕一字 夫如此求者可不

闕九字 鑿巖因禹不必闕一字 須

達之園擺指非倅安在

闕九字 搏翠壁而上闕一字 攻香龕以

洞啓通礮密石見

闕九字 湛然不動復次隋所圖擬殫其闕一字

異寂闕十月貞孟陬則闕三天闕一之建正是如來闕十

雖古之介福未始臻于闕二惟夫人姓牛闕十寇牛父

厥後有晉將軍闕一金金十一闕十即夫人烈考也始闕三

趙闕七次曰闕六貞曰頤貞曰彙貞闕九歷闕交汾

陰闕五監察御史未闕一屬闕三河闕五于闕一吏公之

懿親闕三不調終於檀州錄闕二軍事夫人闕三直而敏

喜愠如一道心闕一然內訓垂裕初府君之沒也長子方

冠少男未髻趙闕五以禮蘭玉竝秀闕七在堂已六子從

政闕二而不遠闕二風樹忽驚闕十載宏闕八豈其闕一

爾下興佛是闕一

字全空然長雅少如實存素令也

故襄州刺史靳公遺愛碑銘并序

重刊

江漢閒州以十數而襄陽為大舊多三輔之豪今則一都  
之會故在晉稱南雍在楚為北津厥繇咤雜亦云難理而  
前此領郡鮮能安人或寬或猛或拘或抗跡多弗類俗亦  
弗寧是以天子念與我之理而公受煩卿之寄矣公名恆  
字子濟其先某人也祖帥幽州長史父禮庭奉天討監察  
御史世不苟合義在難進雖無充量之位而有積善之烈  
矣公性持重有器望即溫而厲居敬而簡度量可以軌物

德義可以服人而先王遺言率由好學君子行道必本忠  
恕浚源水潔厲翼雲翔故一舉爲拾遺已有遠致三入爲  
御史侃然正色當時知音謂且大用而尚書理本郎官選  
才亟踐諸曹克壓羣議及再典大郡遂佐益州攝御史丞  
都督西南軍事原軫超將豈惟上德翁歸中立實兼文武  
先是兵連蠻徼歲轉軍儲擾我公私費以巨億公乃急其  
所病思有以易之建大田於雲南罷饋糧於巴蜀向之踰  
重阻冒毒瘴負擔以踣斃垂耳於剽掠者每十有五六及  
公底績盡境賴全至於是邦也政實有素今也惟行不違

其方以索其極莫不教之誨之優之柔之從者善之否則  
威之先德後刑端本肇末物知所勸事則有經率訓者眾  
多變薄爲厚感惠者深遠旣和且均夫然後人斯恥格庭  
少諍訟參佐閒拱屬城晏如其始也一年而政成其終也  
三年而頌興愛之如人母畏之如神明開元十二年以理  
跡尤異廉使上達天子嘉之稍遷陝州刺史暨解印去郡  
攀車盈途或願借無緣而人吏遮道或瞻望弗及而老幼  
啼呼如是者五里已終朝十日乃出界而皆有言曰捨我  
何之及聞公之喪哀可知矣而爲之罷春以之輟惠愛之

結溪古今之憾一蓋爲仁由已而遺德在人者其若是乎  
郡中士大夫與門生故吏聚族而議謨德是以刻石立紀  
彼鮦陽之泃墮淚成碑此峴山之績銘曰望我及古女  
英英靳公宣哲秉彛爲我髦士作人元龜倜儻大節磊落  
瑰詞人亦有言天實資之御史直繩郎官高選動必兼遂  
能皆再踐糾遏邦慝彌綸事典遂及我人化流樊沔激厲  
素風抑揚善政約紀爲法急人所病物故推誠事匪忘敬  
感被於下仁明在詠舉德不鮮涉道載溪穆然清風莫其  
遺音繫公旣沒厥跡可尋勒石是圖以慰眈心善之否傾

二變景大唐故光祿大夫右散騎常侍集賢院學士贈太

公其顛吳子少保東海徐文公神道碑銘

并序

夫物之所宗也莫善乎德行道之以明也莫先乎文學人  
倫以具體爲難世業以濟美爲貴有能兼之者其東海公  
乎公諱堅字元固其先東海郟人永嘉之後仕業南國因  
家吳興焉隋氏平陳徙族入雍今爲馮翊人也原其伯翳  
平水土實佐文命偃王行仁義大啓徐方因國保姓克昌  
厥後逮乎漢魏間出仁賢十二代祖晉江州刺史順德簡  
侯寧至五代祖梁直閣將軍慈源侯整整生陳始安太守

綜綜生隋延州臨真令方貴方貴生唐果州刺史孝德孝  
德生唐西臺舍人贈禮部尚書齊暉出入六朝載祀數百  
文武冠冕存歿光靈訓子克家謀孫必復賢風儒行世有  
其人公卽尚書府君之元子也生而濬發默識經藝粵自  
童亂則善文言時先府君爲沛王侍讀公之岐嶷聲振平  
臺王聞而延佇與之談議授簡能賦博奕惟賢門客府寮  
深所厭服奄遭不造十四而孤祖母金城郡君姜太夫人  
念其聰異誨以志學公遂刻勉詣心精微磅礴九流激昂  
三變景倩幼靈實賴愍孫令伯大成抑由祖母上元中遭



姜太夫人喪哀幾滅性制則從禮有感斯絕無聲常淚服  
闕州辟秀才其年登科解巾補汾州參軍事部送邊糶至  
於定襄軍使王本立素重公才署爲管記書奏謀算悉以  
咨之坐耀鋒鋌未嘗肯縻尋而換雲陽尉萬年主簿親累  
出爲楊府功曹振鱗將搏載躍京轂垂翼遠逝有聲東南  
俄遷太子文學時祕閣羣籍大抵訛謬有敕召學士詳定  
公實在焉爲之刊緝卷盈二萬時輩絕倒服其博達尋與  
李嶠等撰三教珠英書成奏御拜司封員外尋加朝散大  
夫卽拜郎中稍遷給事中以公代及文史詞不失舊雖居

瑣闥尚比纏牽遂除中書舍人君子曰舜之官人也二年  
公修則天聖后實錄及文集等絕筆中宗嘉之璽書敦  
慰賜爵慈源縣子賚物五百段旌良史也遷刑部侍郎加  
秩銀青光祿大夫轉禮部侍郎兼判戶部公久踐朝廷累  
登省閣舊章必練卽事無疑雅不煩文滾得大體雲臺高  
議以此歸之進封縣伯食邑五百戶兼昭文館學士受詔  
與天竺僧菩提流志譯寶積經及柳沖等同修姓氏系錄  
三教寶真萬族有倫亟見成矣太平公主內秉國權駙馬  
武攸暨外收人望命公至第拒而不行惡夫佞也景雲初

今上夷亂主鬯東朝宮相四員時難其選二以宰臣兼領  
一則天子故人任良兩宮實在公矣遂除右庶子兼崇文  
館學士修史如故進爵東海郡公食邑二千戶遷右散騎  
常侍以本官兼黃門侍郎尋而卽真祿賜同三品爵崇五  
等道茂兩宮利君謀身舉代皆譽又以刪定格令承恩進  
爵二等公請迴授叔父齊莊帝用懷之遂封齊莊爲長城  
縣子天下義士莫不激昂焉侍中岑羲公之姻婭與其聯  
事浚自危懼求典閒司以遠祇悔遂改太子詹事迨羲禍  
敗地絕嫌疑先是不交定王及此不昵岑氏見炎莫附思

患預防信達人也復以親累出爲絳州歷永蘄棣衢四郡  
山川分位楚夏異齊公政不易宜教以因俗德化歸厚人  
共由之開元中會同京師遷祕書監無何轉國子祭酒皇  
帝稽古崇訓開堂集儒以公才學元長命登首席遂令集  
賢殿修撰又除右常侍以公爲學士副丞相燕公知院事  
綢繆顧問日月獻納恩渥尤及少有其比上將柴於岱宗  
詔公草其儀注定禋祀之位廣配類之儀博文約禮或公  
或革言出而人伏事立而天從時議遠矣及禮畢承恩特  
加光祿大夫時置十銓公在分掌程不愆素且無遺才公

既贊相謨猶從容諷議大鍾必諫溫樹不言啓沃盡規實  
致君於堯舜死生有命空比德於老彭享年若干以開元  
十七年龍集己巳五月丁酉薨於長安頡政里之私第聖  
人震悼君子稱嗟翌日有詔褒贈太子少保贈物若干段  
粟若干石特遣中使內侍伊鳳祥弔祭而別賜布帛若干  
端匹俾鴻臚少卿元復監護葬事官給鼓吹儀仗太常考  
行曰文君子曰仁而愛人敏而好學家有榮業紹其弓冶  
國有大事修其典章謚之曰文不亦宜乎其年冬甲子與  
夫人故南陽郡夫人合葬於萬年縣之少陵原先塋禮也

公寬裕有禮溫良能斷智出於象外樞得其環中行之積也厚名之立也大故起自黃綬累踐赤墀五省推高連州得宸事將時並位與才偕莫之天闕也至於升堂入室接微覩奧動有禮樂之運言有雅頌之聲是惟無作作則萬物和而八音備矣蓋嘗注史記修晉書續文選大隱傳及有文集三十卷皆資於故實博於遺訓古今通變河漢共高或藏名山或升天府疊疊然各得其所嗚呼文仲歿而其言立子產終而遺愛存公則備焉空受戩穀保艾厥後代代守之有子曰峻嶠魄等才以雅著孝以特聞學茂高

曾之科旨詞雄祖考之風格備歷清貫皆立能名三賢德  
聲方賈氏無愧累葉儒訓與班門孰多咸瞿瞿如皇皇如  
昊天不追終身積痛求舊撰實勒諸墳道僕從述者之後  
敬而伸之乃爲銘曰

舜命益虞疇功帝俞偃行文教代集通儒光華鼎閱出入

秦吳門多長者君其最乎其曾是好學果行洵美日就鱗

成風積鵬起黃綬覆簣朱門方軌官籍正人朝稱良史其

三入承明五遷外郡道有出處心齊喜愠帝思啓沃國尚

師訓屢獻箴規偏承顧問其居常有異博而無惑綿莚孫

通銓衡叔則為龜為鏡立言立德胡不慙遺左右王國其四

悼興冤旒哀結衣簪官供羽仗士惜人琴已矣終古平生

德音松枝掛劍碑字生金其五

秦吳門 大唐金紫光祿大夫行侍中兼吏部尚書宏文館

校命益 學士贈太師正平忠獻公裴公碑銘并序

夫道遵常習故蓋人拘於凡也得精亾麤是天縱於聖也

方聖上之拔太師也豈藉譽於朝廷哉徑取才於無跡懸

收功於未朕而終致大用克成休烈使祖虛名者見西子

而憎貌工橫議者聞魯連而杜口乃知古謂則哲惟帝其



難今之得人遇聖爲易能允明主之鑒不負眞賢之實者

其在正平忠獻公乎公諱光庭字連城河東聞喜人也伯

翳之後與秦同姓始封於裴因邑命氏在魏晉之際爲人

物之傑與瑯琊王氏相敵時人謂之八裴八王自茲厥後

奕代更盛大王父定高周大將軍馮翊太守瑯琊公入父

仁此處基字  
避元宗諱隋光祿大夫追贈持節原州都督天之旣厭

隋德矣見危致命不亦難乎諡之曰忠春秋之義也父行

儉禮部尚書兼定襄道行軍大總管聞喜縣公贈太尉時

或有奸王命矣禁暴安人不謂重乎諡之曰憲尊名之典

也公卽太尉公次子降神元和含光不耀越在初歲已有  
老成雖遠大是圖而近識莫悟學揆帝載何事小名業綜  
人倫豈矜一善弱歲居太尉憲公喪幼以孝聞尋補宏文  
館學士神龍初明經擢第授家令寺丞轉太常丞加朝散  
大夫景龍中以親累外轉尋入爲陝王友改右衛郎將丁  
晉國太夫人憂柴毀骨立殆至滅性服免起爲貝州別駕  
未之就也復除右衛郎居無何遷率府中郎嗟乎有其道  
而無其片不可行也得其時而不得其志亦不可行也公  
負經綸之器韜王霸之略自委泊外臺棲遲下位出入從

事十數年閒坦然而自若者何哉蓋知才有所必伸命有所必與非苟而已開元中聖上思光祿之休烈嘉太尉之元勳是必象賢其將大受特拜司門郎中轉兵部仙臺之文始應列宿鴻漸之羽可用爲儀遷鴻臚少卿以觀其能也是歲天子有事於岱宗諸侯會朝於行在執籩豆者不限於中外獻琬賁者亦勤於駿奔莫不來享無有遠近而執政者以公代曉邊事職在行人且曰夷狄豺狼黷盟阻德我今有事戎或生心我張吾師有備無患若何公曰不可夫封禪者所以告成功也觀兵者所以威逆命也云亭

苗扈非一時之事也受脤執燔非三代之禮也天方佑我  
光啓舊服憬彼獯鬻能違天乎無庸勦人可以謀告從之  
秋九月突厥果使其相執失頡利發與其介阿史德暉泥  
熟來朝公之謀也東封還遷兵部侍郎圻父之職夏卿之  
亞存而舉者悉以咨之公於是考遺訓補缺典飾蒐苗獮  
狩之禮詳施稅簡稽之賦頒九畿之政設九伐之刑以練  
國容以精軍實邊鄙不聳帝用嘉之旣而拜中書侍郎同  
中書門下平章事兼御史大夫王言其出需乎人有歸也  
天憲惟明肅乎人知禁也尋加銀青光祿大夫換黃門侍

郎俄遷侍中兼吏部尚書宏文館學士總百揆之樞轄酌  
九流之淵奧叶文軌之殷度人神之和木火象鼎其惟實  
餼山川出雲用作霖雨時哉之會無得稱焉先是大化之  
行務以元默遵夫簡易舊章在而不議吏道雜以多端公  
於是求革故之實契隨時之義作執秩以平之設循資以  
定之謹權衡以選之考殿最以參之姦回無所措其邪嚙  
嗜不能介其量多士動色羣方改瞻仰之者邈乎如山窺  
之者間不容髮或曰執事無乃惠歟公曰大命敢不敬歟  
若然方將致六符於泰階驅百姓於仁壽豈直睥睨先世

紛綸近古汨而隨流守而勿失云爾哉二十年冬上幸河東祠后土命公兼左軍師禮畢賜爵正平男加光祿大夫抑人有言曰樹德莫如滋積仁莫如重則臧僖之慶有後於魯欒武之德未絕於人宐公侯之子孫必復其始也公嘗讀易至益之屯與升之漸迺喟然嘆曰物惡有滿而不溢高而不危者哉旣而居不崇侈動不踰法雖百乘之家萬夫之長沖如也謂日用不知存諸方冊何天年未永瘼此台臣二十有一年春三月癸卯遘疾薨於京師平康里之私第春秋五十八朝廷哀傷寃旒震悼制戶部尚書杜

暹山殯弔祭賻物五百段粟五百石喪事優厚官供輟朝

三日丁未有詔贈太師謚曰忠獻使左庶子攝鴻臚寺卿

李

闕字

監護喪事以某月日葬我忠獻公於聞喜之舊塋

禮也初知星者言上相有變良臣將歿謂請禳之公曰使禍可禳而去則福可祝而來也論者多之以爲知命夫天下之達道有五所以行之者三曰忠孝仁安君忠也榮親孝也周物仁也此三者有一於身鮮矣而公實兼之且媚於人者必好其威福賢於事者必羞其謗政公知其然則以直道匪躬之故忠莫厚矣禮爲人子春秋以致享義於

人臣夙夜以從命公知其然則以時告如在之敬孝莫重  
焉夫以衡石之任陶鈞之力莫不責成於下吏求備於一  
人以故舞文雷同疑獄歲構恬而不改浸以成風公知其  
然則以信察御物之惠仁莫加焉其行已奉公皆此類也  
嘗所著述率於箴規以爲惇敘九族本枝百代王者之盛  
也而義不可以無訓作瑤山往記維城前軌以諷之微而  
彰志而晦聖人之舉也道不可以虛行作續春秋自戰國  
迄於周隋以統之臣子之義也天人之際備矣非洽聞通  
理其孰能與於此乎宜其存無幸人歿有遺愛嗣子詣京



兆府司錄事參軍孝實克家動必中禮丕承後命紆天鑒  
而增華敢跡前修琢豐碑而不朽銘曰

益作舜虞鍼分晉土慶流八族德盛三祖瑯琊象賢懷文  
佩武光祿忠烈殺身報主尚書出將恢我王略文教內敷  
武功外鑠緇衣之敝惟公繼作用晦而明處豐思約鴻臚  
好謀夏卿稱職代天流化佐皇立極納於憲府好是正直  
乃宅冢司謀猷允塞盡瘁事國夙夜在公居無闕政歿有  
餘忠天子命我頌德銘功日月有既令聞無窮

給出天子命姓既斷於日且亦得今聞無礙

八字畧同精猶食塞盡華國風齊孫公弔無聞如

我驚其嗶醉輝升天荒外卦皇立跡陰林憲執我

方如於繼繼亦之始卦公繼於用舉而阻為豐思

屏茂崇赫忠照錄良時主尚書出繼於際五知文

益於我氣繼食晉土與旅入慈對海三時繼眼

而會華頰祖前於發豐軒而不休給曰

此以同輪車參軍奉實真寒慎必中斷丕奉卦命

指天聖

欽定全唐文卷二百九十二目錄

張九齡 十

大唐贈使持節涇州諸軍事涇州刺史牛公碑銘

并序

唐贈慶王友東平呂府君碑銘 并序

故果州長史李公碑銘 并序

故瀛州司戶參軍李府君碑銘 并序

後漢徵君徐君碣銘 并序

故辰州瀘溪令趙公碣銘 并序

故河南少尹竇府君墓碑銘

并序

故開府儀同三司行尚書左丞相燕國公贈太師

張公墓誌銘

并序

故特進贈兗州都督駙馬都尉觀國公楊公墓誌

書銘

并序

文東平呂叔原

并序

并序

大司韻封林翰聖州節軍軍聖州陳史平公

謝小鑑

十

檢定全唐文卷二百九十二目錄

欽定全唐文卷二百八十二

張九齡

十

大唐贈使持節涇州諸軍事涇州刺史牛公碑銘

并序

夫志道莫先於無欲福善莫大於有後始而晦跡終不近  
名非道德之合歟生我勞臣立於遠績非善慶所致歟所  
謂伊人其在牛公者矣公諱意字某其先子姓實始殷後  
有牛父者則宋之大夫允裔蕃衍人物更盛邽為護羌校  
尉崇為隴西主簿遂家隴上是稱冠族其後因官安定爰

處鶉觚今爲郡人亦旣重代矣公之族祖有奇章公者隋  
室宗臣風流篤厚典章損益百代可知天下稱之地靈斯  
在大父通秉志高尚守道不攜當時交辟辭疾不起父會  
弱齡早代有才無祿公夙邁閔凶終鮮兄弟性具純至孝  
思罔極幼以子立志不違邦與道爲徒求仁自我不屑軒  
冕考槃邱園雖云屢空晏如也六郡自古五方雜錯負力  
怙利上氣好武人庶相放風俗不純及公沖和其返真樸  
外以義行格物內以默致頤神不飾智以驚愚不棄同而  
卽異有恆其德無斁於人隣落爲之變風狼戾以之率化

公旣浮雲不義介石惟一或勸之仕但笑而不言飛鴻冥  
冥胡可量也開元六年隨子西征以就色養春秋高矣道  
茂年衰魂氣其歸賢達共盡越五月寢疾終於伏羌之官  
舍時年七十有六冬十一月歸葬於北原夫人同郡王氏  
不享偕老先是卽代母儀婦德宋子齊姜自歸於我宐爾  
家室不有配德曷生此子有子仙客爲國之良用商君耕  
戰之圖修充國羌胡之具出言可復所計而然邊扞長城  
主恩前席且以子貴之義有加父存之禮元澤下逮素風  
激揚陰德所流大福斯至十八年有詔贈涇州長史二十

二年冬且有後命贈使持節涇州諸軍事涇州刺史夫人  
追封太原郡夫人於戲存而累仁沒有餘烈福自昭於元  
體道非冀於異時及其影響同符寵光如答雖松楸已拱  
而章紱載華死如可作無異會稽之節生苟爲恥安用雁  
門之肉貴與不貴可不然乎嗣子銀青光祿大夫太僕卿  
判涼州持節河西節度使兼隴西羣牧都使支度營田使  
隴右採訪處置使攝御史大夫隴西縣開國子仙客叩心  
追遠號天莫逮以爲先美蓋闕後嗣有愧且澤漏幽壤得  
不銘恩名典本州豈徒錫羨而已銘曰哭而不言氣壯莫



隴上多靈山西好武君貞獨幼不斯取惟道爲徒與代  
立矩善有餘慶風亦變古不學而知不行而至跡有相混  
名無自異出入百年終始一意福流於後神明其事行止  
於身用存元體厥子嘉績中朝縟禮邛迴壠隧門重旌棨  
逸人之墓今同郡邸

唐贈慶王友東平呂府君碑銘

并序

夫官雖序賢志道者不常有位才雖屈命福善者未必無  
後子夏文學之達以爲富貴在天于公決曹之平則云子  
孫由我蓋不享當代生數猶奇流慶後人互體乃用亨之

會也蓋有原焉公諱處貞字虔求東平人曾祖北齊幽州  
長史府君諱贊祖隋貫州中正府君諱伽考渝州清池今  
府君諱師昔伯夷佐唐實典三禮四嶽佐禹用平九州虞  
夏以功而見封申呂因邑而命氏惟時厥後奕代不承公  
正性之有自來直道之不充詘嘉勇退之又德避近名之  
未然越在弱齡棲遲事外用光本於藏曜履行期於滅迹  
不遠於仁行之斯至不苟於義方之自正佐一郡而卽安  
居九夷而匪陋始不然者公何掾於東裔哉起豕授元州  
司戶參軍晏如也言旋初服遂從所好外物之槩不離於

風塵遠子之言惟聞於詩禮所謂溫良淑慎無競伊人者  
歟天冊二年夏四月遇疾終於家春秋五十有二開元十  
四年冬十一月葬於邑城西南四里原夫人北地傅氏祔  
焉夫果於立誠靜以俟命力不足者則不疲運不至者則  
不憂物情之難及我而易是以名利眾之所欲也公則澹  
泊之德義人之所鮮也亦克蹈籍之如此而神不勞福不  
流未之有也有四子長曰元知今左威衛司戈次曰元悟  
中散大夫使持節鄜州諸軍事守鄜州刺史次曰元智左  
威衛執戟次曰元爽左衛長上惟元悟至大官此其教忠

有舊服義無斃好爵是與餘慶所貽入爲王門之長出居  
邦伯之列屬恩推子貴名彰身後事有光於冥漠德乃發  
於馨香三命爲大夫百代稱先子孝理所賜邦族爲榮開  
元十七年有制贈公慶王友夫人贈河間郡君異人之符  
至是斯驗惟神之鑒謂之不欺公之女孫曰東平郡夫人  
冠軍大將軍右監門衛大將軍渤海高公之夫人鄜州刺  
史之女也冰玉相輝椒蘭同馥由福履於君子與嘉會於  
善人齊姜于歸魚軒華以照路廊時之往熊戟殷其若雷  
有車服而始大履霜露而追遠於戲食于舊德無忝爾之

奉先樹之休聲有以見其歸美銘曰

赫赫我祖惟師尚父泱泱大風悠悠終古施于初裔憲是  
文武我美其濟我則斯取雖匪高位亦惟碩德我王之友  
彼夫之特旣貞且亮宐語而默投足皆安終身不忒我我  
積善以福後人盱嚮家慶煒煌宗姻瞻彼松檟錫之絲綸  
今也追飾實爲先臣先臣伊何宐其有後志之所尚義無  
所苟身雖旣沒名豈虛受立德在茲亦云不朽

故果州長史李公碑銘

并序

公諱仁瞻字某趙郡房子人其先自段干木至柏仁侯皆

以醇德茂功奮於上世始於藩魏終而將趙其名不殞遂  
濟於今五代祖後魏中書侍郎始豐懿侯璨璨生徐州刺  
史始豐順侯元茂元茂生趙郡太守府君諱子雲子雲生  
駙馬都尉直閣將軍府君諱道宗道宗生齊尚書兵部郎  
中府君諱山壽公卽中府君之子仍世濟美在邦攸宐  
故我公稟靈中和履道元吉以學則擴其奧旨見聖人之  
心以行則踐其嘉言合君子之度以故動爲人譽名乃日  
宣義府孔修德輿云遠固未可量也隋大業中舉孝廉洎  
唐興調棣州司戶參軍凡遷磁相二州總管府戶曹參軍

宜州錄事參軍莫不事人以直反身於誠處卑能安敬長則順故光輔郡將周爰咨度自州徂州或嘯或諾旣而遷金鄉晉陵二縣今精誠以庀事善教以長人四封用孚三英以粲彼蒲與密獨何有焉以課最遷歸州治中郢州司馬加朝散大夫行果州長史盤桓參佐未復公侯道非吾行德無必貴遂以沒代豈命也夫某年月卒於官舍享年若干及喪至自蜀而葬不歸趙乃卜宅於許封樹汝墳子孫遂家亦旣重代至開元中公之孫曰察以古諸侯之祿奉先大夫之祀晝遊本郡輝光前烈非清白以遺善慶之

金定全序文 卷一百九十三 六  
餘保艾爾後人亦何以臻此於是履霜爲感恭惟春秋之  
事刻石是圖俾揚祖宗之業斯善繼者也敘而志之銘曰  
長史英英作爲世程動合雅度綽有令名以之入官從事  
而昇以之佐郡爲政孔明悠悠上天曷不貴德終於參佐  
孰云邦國孝孫其昌餘慶乃彰宰樹蒼蒼徽音不忘

英以榮故瀛州司戶參軍李府君碑銘

并序

君諱元祐字某趙郡房子人祖山壽齊尚書右丞兵部郎  
中父仁瞻朝散大夫果州長史系德所載見於先碑公懿  
烈無忝雅有風度體和而韻緡之以絲性婉而文受之以



采故好學不倦而墳典必精慮善以動而規矩皆中悉心  
存乎道義餘力見於文章人以美談日聞休譽弱冠舉進  
士調補同州參軍換瀛州司戶參軍以素所履以施有政  
居獲乎上往得其中無不嚴祇長吏之所嘉歎無不崇讓  
同官之所厭服宜爾戩穀光昭今圖如顏子之不幸豈卜  
商之云命某年卒於官舍春秋若干公家代尚儉子孫是  
式初先大夫之喪也清白以遺而果無私積高燥是營而  
庶有餘慶豈所謂不戀本達也無懷土以重遷不傷生仁  
也無困財以乏祀夫然趙之北際何必故鄉許之東偏亦

金定全唐文 卷三十一  
云樂國故喪之歸也遂窆於斯及嗣子察受教義方能纂  
德業服事華髮潔身清朝天子方差擇其良惠恤於下由  
是解印少府剖符本州衣繡而歸雖榮之在畫重茵以坐  
而養不逮親結諸心形諸色孝子之志國人所稱於是乎  
歸美以揚先謨德以示後蓋蒸夷之義也得無述焉銘曰  
倬李侯代載德行時範言士則三英粲百夫特肥而家華  
而國美無度命不融足方騁途斯窮子餘慶享次嵩我不

訓藹遺風

後漢徵君徐君碣銘

并序

後漢高士徐君諱穉字孺子南昌人也先生受天元休含  
道傑出生知而上貫之以一體資清純動適元妙知道之  
將廢乃窮而獨善躬耕取資非力不食鄰落所處率化無  
訟在漢之季遭時溷濁不抗迹以庇物故退棲山林不苟  
利以辱身故進無祿位五辟宰府四察孝廉又舉有道就  
拜太原太守皆辭疾不起延嘉二年尚書令汝南陳蕃僕  
射南郡胡廣相與上疏極言先生宜爲輔弼協和人神漢  
桓帝猶能安車元纁備禮徵聘而竟不屈志知時之不可  
支也然而諸公嘉招雖不之屑就及聞薨卒徒步弔祭禮

金定全序  
卷二十三  
八

有所尚隻雞不薄意有所加生芻爲貴士之感義實哀世  
之有補人而見德俾後生之可尋其廢中權行中慮皆此  
之類也昔者夷齊介潔而遠去沮溺野逸而離羣顏闔鑿  
坏以遁逃接輿狂歌而詭激此誠作者或類沽名夫有所  
不爲志則偏也無適不可用之極也先生則貶絕在心而  
經修於世純儉以存戒博愛以體仁應物以會通全已以  
歸正漢庭所以宗其德天下所以服其行豈與彼數子直  
逕庭而已哉靈帝初欲蒲輪聘會先生以疾終時年七十  
二有子曰季登篤行孝悌亦高尚不仕皇唐開元十五年

予不牧茲郡風流是仰在懸榻之後想見其人有表墓之儀豈孤此地則先生之德其可沒乎銘曰

靈芝無根醴泉無源角立傑出先生斯存英英先生德不可名麟出無應鴻飛入冥道高事遠跡陳名劭勒石舊邦以觀其妙

故辰州瀘溪令趙公碣銘

并序

有唐瀘溪令晉國趙君諱某字某終於其位嗚呼魯史既沒稱行者不在茲乎荀孟以來論命者亦何謂也放其言而無苟作合乃遷行其志而不迴與權必遂故道每屈於

位身必後於時而猶守真不奪固窮自若立誠者既獨其  
所善尚德者徒隨而爲名名非欲彰以美實而自著位非  
欲下以屬守而遂卑此由命而然歟爲自我而然歟無代  
無之而今實續之矣公太祖盱北齊河間太守因家於饒  
陽亦既重代今爲饒陽人也曾祖北齊幽州大總管大父  
隋鉅鹿大中正府君烈考范陽令府君皆累行積慶以貽  
於後正性直道遂鍾於公公剛潔不羣精明獨斷非義所  
在不以利汚名非禮所安不以跡傷教有立卓爾童丱而  
然既學大成紛綸博綜將求祿養也而俯就鄉舉尋而明

經登科補太子正字又改射洪尉皆以逮親自乞執政哀  
之遂屈換定襄尉公欣然而捧檄矣秩滿轉洪洞主簿永  
城丞時縣宰敗類公止之不可雖盡同官之心且急下人  
之病義形於色彼用我讎此貪而無親難與心競公剛亦  
不吐乃邁力爭迄用上聞因而坐免邑中黔庶莫不咨嗟  
求而得仁退則無愠矣乃返初服遨遊墳索精義致用清  
風被物或太守咨訪偃息自若或諸儒稽疑廢疾皆起是  
時中書侍郎河東薛元超人倫之表也將命河朔實舉廢  
滯企我休風延以殊禮立譚體要大見嗟稱以故表聞其

庶乎簡在帝心會有陰忌之譖實爲無妄之禍矣進旣曾  
母致疑退而賈生投弔不無故也以此左遷瀘溪丞公竟  
不自列窮則體命雖在幽闇鬼神不欺苟推忠誠蠻貊何  
陋時縣無長史政則我由未歲月而已成無谿谷而不悅  
互鄉自專之子左言難曉之民翕然同辭乞爲父母於是  
詣闕投疏至于再三朝廷允之則授瀘溪令公聿副誠請  
增修德化乃鄒魯設教而夷楚變風迨公遷歿闔境號慕  
古人遺愛何以加也遺令戒子留葬洛陽斯又不戀本達  
也有子曰瑄歷官侍御史尚書郎洪州都督霜露旣變則



感念以時陵谷有遷而音徽何代君子所懼于斯謨德銘  
曰  
洛趙侯之德好是正直令儀令則不回不忒寔邦之選彼  
夫之特玉堅而折膏明自煎辰陽于遠激浦迴澶下邑已  
矣君子殲旃遺令桐鄉歸魂崇芒瞻彼有洛維水泱泱德  
音不已于是揚揚

故河南少尹竇府君墓碑銘

并序

序曰正其身君子所以慎德敏于行吉人所以寡辭或道  
之或處之是亦正命命之將行利有攸往則行不家至而

人勸言不面命而事濟不爲跡而實以阜蕃不沽名而聲以適駿夫如是者存乎其人故河南少尹竇公蓋有之矣公諱某扶風平陵人自後魏大將軍侍中永富公至烈考瀛州刺史贈刑部尚書莘國公六葉矣皆增華卿族見重公朝四國于藩四方于宣龍旂承祀六轡耳耳公所謂盛德必祀承簡子之始大積善餘慶是哀伯之有後故生則靈知長而純固旣白而受采亦黃以通中天假不器之性人服自然之理而況於文雅緣飾志業孔修引伸足以長人動用足以利物旣學從政其歸簡易形有方殊道以一

貫人致一意而已我乃萬日盡張故其始也以明經上第授彭州參軍事詢謀郡將器異甚厚所遇森然其言固矣如山之爲始於覆篲如江之導終以方舟於是累遷至於薛王友贊善大夫燕王築館以待士漢儲立苑以招賓當其推擇莫匪賢俊議者惟允而公在焉然由韞匱隋和十城空其價蹀躞驥騄千里未之騁及其用也再入尚書郎遂爲洛陽令三臺雅望一時精選舊章資以彌綸利器呈於盤錯出宰百里實推三河其賦政則必反於其身亦旣誠信被之於物是爲惠懷故雖二州餘弊儉巧而難理五

郡尤劇權傾而多姦莫不可使由之今自求之善處中於  
下韞能合契於游又至於釐舉風俗之謬裁正人倫之經  
務勸衣食之原調均徭賦之事本爲已任無間人言故視  
事踰四年通而不倦遺德在百姓久而益彰非夫明允宣  
和優柔博約自我之不忒爲人之攸暨亦曷由臻茲厥有  
洛陽所謂賢令者則周紆王渙孔翊祝良公實續之誰其  
似之屬天子建中都營新邑資爾亞尹伊其董司朝選其  
人公首斯舉以故稍遷河中少尹且有後命廢府而復遷  
河南焉以公之歸從人之望官則改次政無易方以佐理

王都以表則天下而年不克祚位不光寵遇暴疾而卒悲夫是歲有唐開元之九年春秋五十有六公以孝友爲體一變而迪忠信以明恕爲用再變而致循良故所行無擇所事無巧有恆其德終且溫溫不伐其功昭然赫赫所以遺愛固結必在何武之去稱誦斯深惟恐子產之死已而神道欺而不福物情喪其所賴人之不幸今也云亾及喪之西歸則人吏致哀道路相屬得人心如此其旨可知冬十一月葬於北原後之人或者將遊於斯歎於斯彼其與歸我乃不朽矣其子八人長曰某次曰某家有太邱之德

金定全唐文 卷三百九十三  
里以高陽之名夙構閔凶能哀傷以殆滅匪革其道懼功  
伐之不傳俾予爲文以敘孝子之志銘曰

緜緜瓜瓞少康遺烈靈則長兮莫莫葛藟王孫承祀世其  
昌兮而我實續如金如玉載錫光兮咨亞尹之德柔嘉維  
則揚令聞兮惟別駕之功邦國不空暇胥詠兮不競不綵  
不剛不柔以成政兮德之攸好神之所勞實降祥兮有美  
有度曷不允祚今則亾兮我著名節俾無泯滅惠無疆兮  
故開府儀同三司行尚書左丞相燕國公贈太師

張公墓誌銘 并序

大唐有天下一百十三年開元十有八載龍集庚午冬十  
二月戊申開府儀同三司行尚書左丞相燕國公薨于位  
享年六十四嗚呼哀哉皇帝悼焉素服舉哀廢朝三日乃  
下制贈太師蓋師傅之舊恩禮有加也詔葬先遠喪事有  
日又特賜御詞表章琬炎公義有忘身之勇忠爲社稷之  
衛文武可憲之政公侯作扞之勲皆已昭昭於天文雖與  
日月爭光可矣公諱說字道濟范陽方城人晉司空壯武  
公之裔孫周通道館學士諱弋府君之曾孫慶州都督諱  
恪府君之孫贈丹州刺史刑部尚書諱隲府君之季子自

上世積慶及公而祥發神明所府道德爲樞生以寧濟幼而休祥鷹揚虎視英偉磊落越在諸生之中已有絕雲霓之望矣初天后稱制舉郡國賢良公時大知名拔乎其萃者也起家太子校書迄於左丞相官政四十有一而人臣之位極矣尚書國之理本公悉更之中書朝之樞密公亟掌之休聲與偕升降數四守正而見逐者一遇坎而左遷者二其餘總戎于外爲國作藩所平除者惟幽并秉節鉞而已至若三登左右丞相三作中書今唐興已來朝佐莫比蓋聖賢之運有會師臣之道欲行人雖求多我每餘地



馨香之發敷聞自久宐其翊戴聖后師範百寮功烈過於  
如神德聲出於咸 此固與版築崛起屠釣作合之類亦  
云異也公志元遠而性高亮未嘗自異會節乃有立何所  
不可體道以爲宗既定國於一言亦保身之大雅其於經  
理代務雜以軍國決事如流應物如響紛綸輻輳其猶指  
掌及夫先聖微旨稽古未傳缺文必補墜禮咸甄與經籍  
爲笙簧於朝廷爲粉澤固不可詳而載也始公之從事實  
以懿文而風雅陵夷已數百年矣時多吏議擯落文人庸  
引雕蟲沮我勝氣邱明有恥子雲不爲乃未知宗匠所作

王霸盡在及公大用激昂後來天將以公爲木鐸矣斯文  
豈喪而今也則亾嗚呼克生以輔時而臣道不究致用以  
利物而人將安仰上撫牀以念往下輟相而哀至復見之  
於公焉太常議行謚曰文貞二十年秋八月甲申遷窆於  
萬安山之陽燕國夫人元氏祔焉夫人故尚書右司員外  
郎武陵公贈幽州都督諱懷景之女也動爲柔範皆可師  
訓及公之貴連姻帝室雖處榮盛若非在已內執謙下外  
睦親踈古之賢明未始兼有開元十九年三月壬戌薨於  
東都康俗里第享年六十四長子均中書舍人次曰均駙

馬都尉衛尉卿季曰椒符寶郎泣血在疚皆我之有後也  
嗚呼元堂永闕何事春秋幽篆斯存亦云不朽而已銘曰  
天有密命滋液百寶時無大賢誰與明道我公允叶我德  
孔昭翰飛戾天羽儀清朝功遂身謝名由實美言而有立  
古無不死南山之下詔葬於茲後之與歸惟我太師

故特進贈兗州都督駙馬都尉觀國公楊公墓誌

銘 并序

公諱慎交字某宏農華陰人也其先食采於楊因邑爲氏  
始大於兩漢更盛於周隋司空觀德王士雄公之高祖也

台階論道盟府書勲利建維城澤流後嗣泊右衛將軍贈  
兵部尚書府君諱嘉本累葉炳靈六轡承祀而皆千里一  
舉逸翰所推五侯同拜貴戚莫比公卽尚書之子也誕保  
中和克紹前烈幼以美秀兼大叔之文長而嘉聞增季友  
之業孝弟忠信蘊乎生知禮樂詩書成於時習弱冠以門  
子調補晉州參軍中宗之在春宮也妙簡才地將降天孫  
兼之實難而公惟允以選尚長寧郡主加朝散大夫拜通  
事舍人累遷右衛郎將神龍元祀中興在運預聞大策克  
樹休勲而貴主宐家旣增湯沐列侯傳國復錫山川至是

始襲觀國公拜駙馬都尉左千牛衛將軍加上柱國累遷  
祕書監兼太子賓客增秩金紫光祿大夫又特進散騎常  
侍右千牛將軍陝王傅坐事左出巴州刺史入爲光祿卿  
復出爲亳襄陳鄧四州刺史左轉廊亳許絳四州別駕公  
性明敏有器韻不求虛譽而百行允修不矜小善而九能  
咸事至於入官從政東文西武才旣兩可事亦百中且不  
恃貴以傷義不怙寵而廢公奉以周旋加之撝挹雖在降  
出無他悔恡此亦公之善自爲謀以道終始者也開元十  
二年四月癸卯遘疾薨於絳郡之官舍春秋五十天子悼

焉有制贈使持節都督兖州諸軍事兖州刺史仍遣使弔  
問令返葬京師率禮有加哀榮異數其年秋九月甲申葬  
於北原其孤曰某等熒熒在疚願圖遺烈後之人亦知范  
宣之世祿豈獨臧孫之立言銘曰

巖巖太華作鎮西土祚我諸楊降生厥祖四代而立爲漢  
元輔爰及初裔克復先古猗嗟觀公不忝前人荷天休寵  
爲國嘉姻王孫作儷帝子來嬪瓊敷玉潤輝映紛綸乃登  
王朝乃尊爵秩祿盈萬鍾賦食千室亦克畏滿亦以戒逸  
物更盛衰時有得失稟命不融斯人則亾天歸京兆地

連岡吁嗟此室徽音不忘

張九齡

國平樂於空舞音不念



欽定全唐文卷二百九十三目錄

張九齡 十一

故太僕卿上柱國華容縣男王府君墓誌銘 并序

故安南副都護畢公墓誌銘 并序

故許州長史趙公墓誌銘 并序

故韶州司馬韋府君墓誌銘 并序

惠莊太子哀冊文

祭舜廟文

爲吏部侍郎祭故人文

祭故李常侍文

祭洪州城隍神文

為王司馬祭妻父文

為王司馬祭甄都督文

祭張燕公文

追贈祭文

姑太對嶽土誌國華容隸畏王

新六篇 十一

欽定全唐文卷二百九十三目錄

欽定全唐文卷二百九十三

張九齡

十一

故太僕卿上柱國華容縣男王府君墓誌銘

并序

公諱某瑯琊臨沂人蓋王氏所由遠矣然其自漢至今上下千載海沂爲頌始壯厥猷淮水作楨克昌其後繼跡台衮聯華牧伯君子躋其立言史官褒其行事則已系無違德人以嘉聞門牒粲然宜爲冠族廼祖某梁侍中尚書左右僕射安東亭侯高祖某陳度支尚書曾祖某太子中書舍人祖某皇朝吏部郎中贈潤州刺史父某官至洪州都

督公踐修範業雅有名器性開敏而達於從事才果斷而長於御下至於學以知古義以隨時虛已存誠離經合道身焉而不傷於物同焉而不害於政咸自得之務其大者儀鳳中初以門子選爲孝敬皇帝挽郎解巾相王府參軍授豫王府參軍歷太子通事舍人蒲州司法參軍丁洪州府君憂去職喪踰於戚行過於禮時其在疚哀能感隣服闋授相州鄴縣令施於政也揮干鎔之鋒截無不斷展騏驥之足行無不至以故言出有孚豈止於百里教行無類俄浹於四封邑人是宜輿頌乃作御史中丞張仁愿表公

尤異帝用嘉焉遷洛州陸渾縣令加朝散大夫寵其能也  
再有仲由之善益聞考父之恭薄理我畿有加於鄴識者  
觀政許其以後圖時輩推多驗之於晚節稍遷蒲州司馬  
洛州長史蒲州長史三爲郡佐一以貫之執心有恆厥聲  
以茂雖巴祗之體素顧和之理識異代同官齊名比義固  
無愧也俄遷隨州刺史趙簡始大列於諸侯張敞有名擢  
爲刺史賢明獨斷政教宏宣始於漢東之美繼以巴中之  
異郡歷數四課嘗第一再領遂縣二州刺史先是俗多梗  
弊人盡流肅公亦來思撫之如子彼得攸暨歸之如市行

有餘力用不盡才驟遷大都督乃拜相州刺史先是景雲  
歲我唐雖舊儀制維新置連率之官增監郡之秩於是歷  
選列辟專謀用賢且有後命而公爲稱首遂作越州都督  
同京官正三品連率統察杭婺衢睦溫撫台閩八州長吏  
已下率由部按事雖竟寢議者終榮仍守越州都督加銀  
青光祿大夫公素有盛名兼之寵數聞望而草風必偃至  
止而蓬麻自直與夫任賢坐嘯勞心行部彼有因而至此  
我無爲而已然政之行焉有若神者徵拜雍州司馬頃之  
又正名爲京兆少尹京兆者本公之樂土居已重世買臣

還郡無矜於出綬張旣本州是榮於衣繡公雖作貳我亦  
爲光開元二年始封華容縣男昭有德也其明年有制以  
公檢校太僕卿訓以六駟正於君僕日加數馬之慎歲有  
展軫之勤無何卽眞可謂貴矣然公思報所受逾勵所行  
神明未衰志業不究春秋六十有一開元六年秋八月乙  
亥寢疾薨於洛陽之陶化里第嗚呼哀哉朝廷傷焉賻贈  
以禮夫人范陽盧氏不享偕老先時在殯其年冬十月乙  
酉合葬於偃師之某原却倚首陽前瞻洛汭豈伊瑕邱之  
樂蓋取邢山之兆有子曰昊次子曰旻泣血苦由哀纏於

遠日勒銘金石儀叶於吉時假以斯文爲之實錄其詞曰

有周之裔居海之沂緒業爲永德音罔違貽厥謀翼俾其

翰飛宐哉世祀亦曰家肥其一洎我華容而今濟美四科冉

季九能魯史學匪爲人義如在已施於有政轡之柔矣其二

雉馴宰邑鷹揚佐郡五爲刺史在邦必訓再踐太僕厥庸

迺奮今也則亾天不可問其三神欺永年禮先遠日合如防

墓開彼滕室鶴弔人悲龜言地吉篆石泉戶與山相畢其四

故安南副都護畢公墓誌銘 并序

公諱某字某東平人四世祖義雲北齊度支郎中青州刺



史曾祖爰貞觀初并州白馬府右果毅都尉右衛郎將祖  
義蒲州河東令坐事左轉桂州歸義縣丞因家於始安父  
誠舉孝廉高尚不仕公卽孝廉府君之子稟靈純茂姿性  
開朗亦旣志學休有令聞雖在諸生之中已有萬人之望  
矣夫其忠有世善有元仁於其親友於兄弟豈尚行所致  
其因心而然公之植身根萌素厚搯本制末何適非宐故  
爲政之方所從來遠矣某年初有御史將命黜陟幽明公  
時盤桓居貞未有攸往而使者承式固才是求褐衣見召  
直繩斯委乃表公授梧州錄事參軍非其好也先是剽劫

在境行李所病綱佐無機逋盜肅然歲滿授廣州湏陽令  
事必簡舉人用穩便莫不咨嗟未始見也尋轉韶州司馬  
其政如初秩滿丁內憂公有至性幾於毀滅廬墓展哀泣  
血扶病有加一等不惟三年嶺南按察使廣州都督兼御  
史大夫蕭璿彼孝悌之士也以錫類之故有嘉德音於是  
拔補按察判官義行相承終始如一尤加欽重特以表聞  
敕授新州刺史屬恩州酋帥日尋干戈將有式遏實資明  
允後按察使廣平郡宋璟以公爲五府總管以甲卒戍焉  
雖臨之兵威而開以恩信俾忿驚狼戾化梟爲人廣平公

深以爲能奏假恩州刺史俄又眞授夷落大寧尋加朝散  
大夫遷端州刺史居必致理莫匪嘉績并護之寄朝選以  
歸於是加秩中散大夫拜安南副都護到官未幾闔忽遂  
殂時年六十某月日庚子歸葬於某山原公內行無玷外  
物不干文非務華學皆爲已所涖數郡遺愛在人全已而  
歸可謂厚矣有子曰某銜恤終天愬哀遠日永惟稱伐存  
乎幽篆銘曰

猗歟畢侯濬源長流受氏於畢爰自有周彼美系載實惟  
孫謀賢哲繼軌斯其遠猷嗟彼懿宗是生孝友知實內積

行非外誘家邦必聞人倫歸厚微此令德夫豈善守亦既  
從政厥間載榮邑能訟息郡用禮成蠻夷慕教鴟鴞變聲  
九真副嶺萬里揚旌護彼絕域義忘險艱緹律未改丹旄  
而還存沒之際忠孝之間徽音無泯篆德茲山

故許州長史趙公墓誌銘

并序

公諱某天水隴城人其先受賜於周所食者趙下逮襄子  
大為諸侯貽子謀孫克用保國有功有伐無代無之曾祖  
某隋尚書左右僕射淮寧郡公祖某金紫光祿大夫殿中  
監贈工部尚書武強公父某符寶郎皆發聞馨香系祚蕃

行不高位者則人望焉公惇師舊業允迪淵懿包君子大  
雅之量有古人獲心之賞修詞以達其道則質文相半履  
行以顧其言則剛柔並克弱冠以門子調補湖州參軍轉  
相州司兵參軍學以入官思不出位格言清論始誦今行  
屬太上皇養德在藩擇賢爲吏公首其舉王曰爾諧於是  
引爲相王府戶曹參軍轉法曹參軍及龍德旣亨鶴鳴有  
應往而利見縻以好爵乃授朝散大夫雍州錄事參軍綱  
領諸曹罔有不率秩滿除洛州伊闕縣令事舉其中斂從  
其薄惠小鎮大徇公滅私政之在人今而遺愛俄遷徐州

司馬未幾轉陝州司馬許州長史千里將騁六轡斯柔得  
之自心動而中節故其四參州事再入府寮一宰畿邑三  
爲郡佐莫不所居而績宣其用所去而頌因其跡豈伊苟  
然厥繇尚矣開元八年春二月疾作革乙丑終於官舍春  
秋若干其年冬十有一月庚午歸葬夫人崔氏祔焉公自  
然淡泊不屑勢利守道貞固與命推遷故歷年多所移官  
數四不過參佐而已豈亦直道之云乎然而卑以自牧約  
而能濟推厚居薄內居其仁急病讓夷外多其義不曰君  
子其能爾乎有子曰令言次曰令則泣血加人抑情就禮

哀想窀穸之事恭惟先君之德驗之所履附之斯文以傳  
無窮以慰罔極銘曰  
猗嗟令德寬仁合道景行行止風流肆好名取公器善爲  
身寶志所以立政所以宣入官准允蒞事其然是儀是式  
不忘不愆今也終古後之克祚子孫禋祀春秋霜露茫茫  
原斯焉永慕荷百升之正黼黻一

故韶州司馬韋府君墓誌銘

并序

君諱某字某京兆杜陵人其先佐夏翼商賜命爲伯傅楚  
相漢繼世能賢休有成烈慶流於裔洎曾祖津仕隋至內

史侍郎戶部尚書武德初拜黃門侍郎壽光男克濟美名  
以食舊德大父太子詹事武陽侯能成休軌載揚厥問  
烈考曩宮止少府監主簿懿業無忝而大位不充天爵自  
高人倫斯貴公荷百代之丕構傳一經之素範簡白足以  
長人文敏足以敷政跡不由徑必期乎直學不爲辨每抑  
其華志尚則然風流自遠斯有萬里之望豈伊百夫之特  
始自崇文生明經上第起家汾州參軍公以爲國無小而  
行無擇苟履忠信何陋蠻貊遂求補遠郡從所好焉於是  
授泉州司倉參軍歷廣州都督府法曹參軍輪困下蟠弗



以屑意幹蠱用譽將以明道固已仁焉而不異於遠義焉  
而不辭於難潛亦孔昭允謂君子秩滿遷韶州司馬在郡  
數載檢身一德輔化致理刑清訟息宐其奮庸上國寘乎  
公卿而矢志南州終於參佐悲夫享年五十有一某年月  
卒於官舍粵開元六年冬十二月庚午葬於少陵原有子  
曰某欲報罔極思傳不朽勒石泉戶式昭德音銘曰

皇矣鼻祖時維大彭黻衣作伯彤弓用征猗那其後世濟  
其名雖公道屈亦樹德聲其一休烈有素聿修無忝言炳身

文禮充物檢行雖欲盡名不可掩學古入官蓋取諸漸其二

參卿彼分從事窮海孰云其陋我惟義在何適非宜胡然

有待天曷我欺人隨物改其三

惠莊太子哀冊文

維開元十二年歲次甲子十二月丁巳朔二十四日庚辰

司徒申王薨於行在所冊諡惠莊太子旋殯於寢粵閏十

二月二十七日壬午將陪葬於橋林之栢城黼幕宵布羽

纛宿設西序啟攢南首成列皇帝淡天倫之戚崇后儲之

禮擬容衛於青宮申孔懷於朱邸爰命史氏稽於令則無

俾直書不彰遺德詞臣曰

昊天有命先后受之分王子弟藩衛京師克荷成憲罔弗  
肅祇懿哉明哲誕惟神粹宣慈日聞孝友天至道則脗合  
迹無自異性則生知學兼時習易微書遠詩言禮立德必  
有隣善如不及貴而能損量固難挹方伯出鎮召南取斯  
司徒入掌鄭武其宣義之所在政乃克施物留遺愛事著  
成規西夏息人東征叶卜焯焯同輦皇皇改服疾構中路  
凶傳左轂寧不憇遺奄鍾斯酷嗚呼哀哉昔在冲眇具惟  
兄弟四國並封五王均體遊必連騎居則同邸各承愛於  
含飴俱受經於置醴旣荏苒而云邁屬殷憂之將啟實定

金定全唐文 卷之三十三  
禍於蕭牆遂繼明於雲陛雖隔深宮之衛常洽家人之禮  
曷殂謝以痛心感平生而流涕嗚呼哀哉爰擇茂典追崇  
上嗣表先聖之元良申友于之褻異紛鹵簿以徒設儼文  
物而空備彼神儀之如在乃羣悲之所萃周禮從祔漢塋  
是陪先遠日而選吉會同盟以送哀夜漏盡兮暗室啟庭  
燎殘兮曉挽催按三校而徐進將一去而不迴嗚呼哀哉  
背朱門兮遲遲馳白驥兮駸駸野蒼茫而助慘風蕭颯而  
增悲翩翩兮素蓋寂寂兮畫帷遵舊途而何有覽陳迹以  
如疑面都邑兮不入待陵寢兮有期惟光儀之永闕與昭

代而長辭嗚呼哀哉潛清暉於幽窆召鴻名於美跡將在  
皇儲之史豈伊諸侯之策播遺芳於蘭桂傳不朽於金石  
諒紀言之在茲嘉德音之無斃嗚呼哀哉

祭舜廟文

維某月朔日中散大夫使持節都督桂州諸軍事守桂州  
刺史兼當管經略使嶺南道按察使攝御史中丞佩紫金  
魚袋上柱國曲江縣開國男張某敢昭告於大舜之靈惟  
神以大孝而崇德以大聖而奮庸以至公而有天下以至  
均而一海內故不以荒服之外不以黃屋之尊巡守而來

殂落於此倦勤之造永結於黎庶惠懷之尊長存於壽宮  
載祀雖遐威靈如在今聖朝紹興至道愍茲遠人爰遣使  
臣按理邊俗惟神幽鑒願表微誠若私僻爲謀公忠有替  
明鑒是殛俾無遠圖如悉心在公惟力是視當福而不福  
爲善者懼矣今至止之日輒詣陳誠伏惟神道聰明亮斯  
欽畏願俯垂冥祐俾輸力明時尚饗

爲吏部侍郎祭故人文

維開元十年歲次壬戌二月癸酉朔十七日巳丑吏部侍  
郎某謹以清酌脯醢之奠敬祭故公之靈聞夫仁必壽

考所謂神道善亦慶延以爲信然今夫子之不福而聖暮  
之是愆孝友純固禮讓周旋行所以直業所以專誠公才  
而天假故官政以日宣節使是式朝宿旣至十部稱賢  
人思媚鳳凰於彼雲霄以冀胡然明靈殲我良懿嗚呼哀  
哉夫子之逝平生之懷襟抱素合遊處常偕清風對禁文  
石同儕自茲兩掖殆將一紀展轉清貫仳離君子曷其愛  
而甫云覲止正司空之掃第屬荊州之罷市歛交臂而相  
失殷痛心其何已今卜兆有日祖載在庭颺然象設冥爾  
音形驅白馬而何見瞻素車之已扃德音不忒應甘棠之

金定全唐文 卷二百九十三  
勿翦交情乃見伊黍稷之非馨嗚呼哀哉尚饗

祭故李常侍文

維年月朔日中散大夫洪州都督張某謹遣倉曹參軍李  
某以脯醢之奠敬祭於故宋國公之靈惟公代載賢傑天  
資忠厚外珪組而雖華內冰鏡而無垢善常不伐明能自  
晦省中之樹訪猶不言車前之馬數而後對淑慎自己否  
亨有時孰能違命公此來思結忠主之戀深去國之悲六  
疾斯起五福云欺生涯溘盡精魄何之嗚呼哀哉追惟曩  
昔昇降雲霄榮華侍從曄曄光昭日歟月歟有榮有凋丹



魏子子白驥蕭蕭同官之感俾予魂銷靈之來歸茲焉旅  
次瞻望無覩悲辛自至頃密邇而寄音今冥然而結歎南  
北於遠幽明永異何以敘情寄之奠饋尚饗

祭洪州城隍神文

維開元十五年歲次丁卯六月朔壬寅十日辛亥中散大  
夫使持節都督洪州諸軍事洪州刺史上柱國曲江縣開  
國男張某謹以清酌脯醢之奠祭於城隍神之靈恭惟明  
神懿皆潛德城池是保民庶是依精靈以秉正直攸好忝  
牧此都敢忘在公道雖隔於幽明事或同於表裏今水潦

金定全唐文 卷三百九十三 十三  
所降亦惟其時而淫雨不止恐害嘉穀穀者人之所以爲  
命人者神之所以爲祀祀不可以爲利義不可以不福闔  
境山川能致雲雨豈無節制願達精誠以時弭災無或失  
稔則理人有助是所望於神明尚饗

爲王司馬祭妻父文

維年月朔日謹具少牢清酌之奠祭於故某公府君之靈  
惟公聯華公族振景天朝昔也時來則地分茅土今也福  
過則海變桑田豈惟魑魅之憂方爲螻蟻之患嗚呼哀哉  
始更榮盛早睦嘉姻謬入郟公之選嘗荷戴侯之遇情契

濶而彌積義流離而益固公之謫宦某又犯時永矣去國  
賁然來思雖窮途之至此幸隣境之在茲所忌者法豈忘  
於私聞柝聲而密邇畏簡書而間之然猶風煙可冀翰墨  
無輟心已運於虛舟跡尚濡於涸轍驟寒暑之徂謝紛吉  
凶之迴穴京兆之使忽追廣陵之音遽絕嗚呼哀哉平生  
多感自傷千里之心已矣長辭徒發九泉之歎計疇昔之  
光寵痛淪亾於旅竄嘗許恤人之孤況霑愛子之半謹因  
遣奠昭告明靈心不可卷德以爲馨匪羞是薦惟魂是聽  
遣行人於信宿空泣目於郊垆嗚呼哀哉尚饗

爲王司馬祭甄都督文

維開元五年歲次丁巳九月丁酉朔十四日庚戌某官謹  
以清酌之奠祭於廣州都督甄公之靈惟公稟氣異人爲  
國良臣資忠秉義奮翼躍鱗富貴自取聲名益震故能北  
擁旄於元朔南仗節於朱垠行部無幾卧理斯屬棠陰在  
聽讙歌成曲下流是仰長塗反促始望雨而隨車遽驚風  
而轉燭嗚呼哀哉甫茲歲首彤襜載輝今也秋季丹旄言  
歸旣寒來而暑往將物改而人非駟馬不馭雙雁空飛對  
平生之氣象詠宿昔之音徽燕越兮地眇胡山兮路微奠

肴觴之在席感徒御以霑衣嗚呼哀哉尚饗

祭張燕公文

維年月朔日族子祕書少監集賢院學士某謹以清酌少  
牢之奠敢昭告於燕國公之靈惟公應有期之運降不世  
之英坦高軌以明道謹大節而立誠懸鏡待人虛舟濟物  
妙用無數精心惟一明未朕而先覩聽有餘而每黜猶豹  
變而成文嘗鳳鳴而中律故能羽翼聖后丹青元化陳皋  
陶之謨謀盡仲山之夙夜道因慮於文武業惟永於王霸  
綢繆恩渥荏苒代謝國重元輔門承下嫁實大我之宗盟

與人君之姻婭天蓋福善地益華宗赫赫爲尹巖巖比崇  
不享黃髮如何元穹旣道長而運短豈祥降而惠終人亾  
令則國失良相學墮司南文殞宗匠惟國華之見奪何天  
道之弗諒追惟小子夙荷淡期一顧增價二紀及茲非駑  
駘之足數蓋枝葉以見貽洎剖符於外臺承徹琴於舊館  
屢行號而身贖空匍匐而心斷跡旣拘於彛憲情未展於  
哀款朝章猥及傳名斯入想德輝而不見望仁里而徒泣  
樹所歎而猶存人具瞻而永戢盡總帳之今感哀烏衣之  
往集庶羞雖薄冀享厥誠尊靈斯降是嘉平生已矣萬古

纏繇五情追悲緒於離筵結巨悵於幽明伏惟尚饗

追贈祭文

開元二十年歲次壬申孤子九齡謹遣弟某等謹以清酌  
脯醢庶羞之奠敢昭告於先考先妣之靈九齡積罪昊天  
天實降罰嚴蔭永隔慈顏重違欲報劬勞終天何極夙承  
教誨幸而有成崇國寵靈猥當大任聖上義存延賞追贈  
所及朝恩優渥跪承摧感伏惟昭亮享茲殊錫今謹具贈  
太常卿廣州都督告身桂陽郡太夫人告身及玉帶金章  
紫衣各一副伏惟尚饗